

arumukaaku

marumukuaku ahlavungulaia, arumuka ahlavungulaia tuahlu uvura
ihlahlamu masunguli. tavahlihla ahlavungulaiana, aucaucani tavahlihla
tamuucu mavacangu, matavutavulau pahluisa parahlava ihlaku, paricani
tavahlihla miasihlipi vikiku, musurarauvu ausi tapu'ai. pasamia kani'i, maku
tatavahlihla pasaulusu ahlu'u hla tapu'ai tapiaili tapiaili.

marumukuaku ahlamacicia, marumuku
ahlamacicia 'acangurahlu, 'acangurahlu ahlamacicia ausi vulaihli mamaini.
akuku mainimana, maru ina'a apariva, iapa'acangurahlu tarutatutukuhlu
sapi, kihlamuhlamu a ina'ana kisuahhlama 'acangurahlu, maru a
sipuamiaku 'acangurahluna, ausi pausasaliri. hlipacaucauaku takacicihli
maku langica miapipihlihli, tapilaluvu 'acangurahlu tapi'ara'arau, ulavaisa
maruaku masungulina matuusuru.

marumukuaku ahlakahlamara, marumuku ahlakahlamara
siriauvucangu. mahlukua hlipatuaiailia maru a pahu pusiamu mulava
ngunguruku, kumita hlimipupuruku pusiamu, aucaucauni palungana
mahlahlisaru hlimilili. kumita rahlunga cucutakuaumumana,
paraatuhlungu ihlaku ucani kari, " maru mahlipapu taku'i'iaru, mutusua

sasaruana rahlunga..."

macacaca cucutakuaumumana mariapusiamu, aucaucani lumuhlana
pusiamu ausi amihla " mamisa tam maritumuhlu maripusiamu ".

marumukuaku ahla'amisana, marumuku ahla'amisana mapuhli uruhla.
aucaucani uruhla muucapi, kutacacurunau masarumu.

marumukuakumana tunumu, kumita hlingua'u, tuku tamuucu
kupisiasiaku kuiatataru, marumakuaku hlingua'u tunumu.

mataingaluaku marumuku masunguli siacalaina, marumukuaku
ruvaruvaruvana kiulusu ina'a arupakakari, tuahluamu murina
arukavavacangu siacalai. ta'iaraisaka tainana matumuhlu arumukakuna,
kuhlaisai marumukuaku mangusipi kani'i.

(文章大意 僅供參考) ※字數限 200 字

我喜歡

我喜歡春天的溫暖、花，我在花叢中和蝴蝶蜜蜂追逐。我喜歡夏天的星星，我幻想著在星空中飛翔，跟著星星到處跑，最後在暖暖的懷抱中睡著。我喜歡秋天的豐收，看著結實纍纍的稻穗，一顆顆黃金飽滿，看到農民樂呵呵收著稻穀。我喜歡冬天潔白的雪。有這麼多的喜歡，所以我喜歡上了生活。